



Chamna Am

(A Monthly Organ of the Evangelical Synod Church)

Vol. XXXV

No. 12

March, 2020



2020
KUM
THUPI:

"NA INSUNG HIHTUP IN"
ISAI 38:1

Editor: Rev. T. Kamgin Gangte

Vol. XXXV No. 12
March, 2020

Editorial Board

Chairman:

Upa Dr. L.S. Gangte, M.A. M.Phil.

Editor:

Rev. T. Kamgin Gangte, M.Th.

Asst. Editor-cum-Circulation Manager

Rev. Khaitinthang

Bible Study:

Pr. Khailalsiem M.Th.

Evan. Paukhomang B.D.

Contributing Editor:

Upa Paozalun BA

Rev. Khaigin BD

Rev. L.Sata B.Th.

Rev. Thangkhosemi M.Div.

Rev. T. Kampu M.Th.

Rev. Henkholien MBS

Miss Chinbawi MRE

Editor ana hite

1. Upa Lalkhogin	1986
2. Rev. Khaigin Gangte	1987-2005
3. Rev. Lamkawsat	2006-2013
4. Rev. Thangkhosemi	2014-2017

contents

- Editorial.....01
- Na insung hihtup in.....02
- Ka lak u a na tel zing loh dinga ahiih chun.....05
- Kipawlkhawmna.....07
- Kichenna puon silhlo10
- Malam zuon zel hitiu17
- Pathien chuh thagau ahi22
- Chawihmawina channa chunga kipahthus genna.....24
- Sapchuom lawiupate chuh!25
- Sapchuom putu te dinmun ding khenkhat29

- Kumkhat lakman Rs. 200/-
- Thusuoh nuom nei te'n ESC Office Post Box-54, Chiengkawnpang, Churachandpur a thak ding.
- Ala nuom leh a man pie nuom te'n circulation Manager, hetsak ding.
- Thukisuo cheng hi ESC Ngaihdan ahi vek khel puoi. Article zikte'n a mawh a kipuok chiet ui.

CHAMNA AW PHUNGVUKNA DING

1. Chief Patron	-	₹ 5000.00
2. Patron Member	-	₹ 4000.00
3. Diamond Member	-	₹ 3000.00
4. Gold Member	-	₹ 2000.00
5. Silver Member	-	₹ 1000.00

PRINTED AT
THAWNSAAU PRINTING WORKS
CENTRAL LAMKA

DAMSUNG TUILIEN AH THIKDET NA TU NÂM?



Damsung tuilien, I tih takleh gentam ngai dingin ginchak a um puoi. A tulai huihnun leh Boruok dinmun haw leh Insung khawsakna hihenla, taksa hiselleh hiselloh na haw genna ahi mai hi. Pathien thil guonggalh dan haw hi I vak ngaihtuoh leh natna haw hile athak thaka a siem muhdawk in a um zel a um zel mai hi. Tuma a TB natna natna lauh um, sukdam theihloh a ana kihe, baihlam taka sukdam theih hung hita. A ban ah Cancer, Aids, tih haw a etkawlna ding damdawi Doctor te'n abuoipih zing lai uh a, tu a Coronavirus hung kiti kit zel, kiven thawhmai tihloh chuh adamdawi ding umtadihlo hina lai. Chun, damsung tuilien in a genpipen khat chuh dodan thiempa Setan panlakna haw hi ahi.

Pathien hehpihna thûk zie leh sân zie hih kuomah teh theih ding guol ahi puoi. Keimah ngei hinkhuo a le ka he a, mi dangte hinkhuo a le tampi muh in a um hi. Vângphat a um na lawm lawm e, tuni a nang le kei zie tawbang thil he thei ding leh mu thei dinga Lalpân ei vak siem mai hih. Mihiemte khawsakna chûknuoi dâinuoi ana himahleh, khawlum khawvawt te I taksa a dinga mamawh dan zil in ei pie a, I taksa suk hât zêl na ding in nêk le châk ei vak pie nalai a, amak hi tihloh gen ding dang a um puoi.

I bible in ei na sinsak namah a, mihiem kuo ahi amah hinna ngei suchawm a susau thei? Mihiem kuo ahi adamsawt nawp zieka ahinna susau? Kuo ahi a damsawt nawploh zieka ahinna suchawm? Suicide (Mahni kithat) kiti haw hi thu chuom in ana um taleh, zie lampang hi hah gen ka guo puo a, Pathien awihloh/deihloh thil ahi, ti'n hetthawh zieng hitiu. Nungak tangval laka hinkhuo ana mang chavai te ahinkhuou a sawt sek puoi, tih thu ahi a, Pathien in ei deih dan a hinkhuo mangte'n ahehpihna haw hi chan loh theih leh neihloh theih ahi puoi. Zieziek chun, Pathien hehpihna chang in kaki he lawmlawm mawh e, ti I um u chun Pathien deih banga hinkhuo manglo I hi kha die aw! tih hi gel dinga deih um ahi. "Damsung tuilien a thikdet tu," I vak tih

nawppen chuh, Pathien deih bang a hinkhuo ana mang te haw hi ahi. Zie thikdet tute hi ahi Vangam a Pathien GO luohpih dingte chu ahiu hi. Tuni hin zie go luoh dinga chu chiel I hiu a, dam sung tuilien laka thikdet I tûk nâk uchun zie Go chuh nang leh kei a ding ahi.



Tukum Thupi “Na insung hihtup in” – Isai 38:1 hi thupi a mangin Philip, Kaisari khuo a cheng te insung akipat in holimna tawmchan vak nei hitiu aw.

- Evang. Lamzagin

Changtel Nasepte 21:8-9, “Chun, a zing chun ka pawtdawk kit u a, Kaisari khuo ka tung u a; tak achun Chanchin Pha gen pa Philip In ah ka tung u a, amah chuh, Jerusalem khuo a panpihtu dinga mi sagih tel dawka umte laka khat kha ahi. Amah chun chanu li a nei a, nungak thiengtho ahiu a, Pathien thu a gen sek u a.”

Ziea Philip kitipa hi, Isu sinsak te laka tel Philip kha ahipuoi, ziepa kha, Bethsaida khuo aum Peter leh Andrew umna khuo a um kha ahi, aki tizawi, John 1:44 ana en in. tin ana gen hi.” Akiti (Nasepte 21:8).

Tua Philip I gennawppen hi ahihleh Philip, Kaisari khuo a cheng, Upa sagih teldawk te laka tel kha ahi. Amah hi Sawlchak Paul in “Chanchinpha genpa, Philip Saul in sapchuomte a sukgimtheih ziekin Jerusalem a sapchuom umhaw chuh sawlchakte tihloh in, gingtu dang cheng cheng chuh, Judea leh Samari gam khuo tin ah a taizak vek tau hi (8:5). Ziea chanchinpha genhi, Upa sagih te laka tel, chanchinpha genpa Philip, Kaisari khuo a cheng

khah hiding in ginchak aum hi.

Naspete 8:40. Philip chuh min Azotas khuo ah amukit tau a, a chihpai a Kaisari khuo tieng in khawtin ah chanchinpha chuh agen zel ahi. Zie chanchin pha genpa philip hi a insung achate umdan/hindan hi bangguol a him vak en zui hitiu. Amah hi thagau thiengtho leh chitna adim, miminpha ahi a, chanchinpha genpa tih le ahi. A insung hi thagau lam ahi, a chate a etkawl dan ahi, ngaihsan aum tak zet hi. Tuhin a insung chanchin hi holimnan mang hi tiu.

Amasapenin Philip te insung thagau leh chitna a dim zing mi minpha insung hi amasapen in ngaihtuoh hitiu. Sawlchak

Paul in a zin vielna ahih tunna leh giekna a amt ahi. Malzin bawl phat hi thiem mah mah ding in ginchak a um hi. (Heb 13:2) Malzin bawlphat ding hengilh kiu in, khutibang phatna apat chun, abain, hetloh hiel in vansalchak tunsak ana hikha thei sek uh ahi.

Chun, Philip zi hi gen in a umpuohna achun, mimaimai hi ding in ka gingchapoui. (Sam 128:3) na zi chuh na insung gil achun grep gui gah nuomtak bangin um intin tin a

gen hi. Khawvel ahih grep hi thei phapen leh thei lim pen mitamtak kivakna ahi. Mihing hileh ganhing hita leh aduhlo umlo hiel theipha ahi. Lalpa isu ngei inle hiti hin ana gen hi, John 15:1-2, “Kei Grep gui taktak chuh ka hii, ka Pa a huon ngakpa ahi. Ka kizawppih bâk gah lo ta cheng a pahi sek a, a gah pha ta chuh a hih thiengtho sek hi, a gah tam zawk diek na’n.” Zie I Bible chang sim ahih, Isu tawh kizawp/kizawm u chuh grep gui gah nuomtak/ gah pha tak hiding ahi. Isu Krista tawh kizawm nu chu gahthum tak in gah kuih kuih zing ding ahi. Tek nung vuoi nung inle gah kuih kuih in a. Philip zinu hile khutibang nu ahih ngei ginchak aum hi.

Nasepte 21:9, “Amah chun chanu li a nei a, nungak thiengtho ahiu a, Pathien thu a gen sek u a.” Pathien thu a gensek ua, thagau thiengtho leh chitna a dim mi minpha, Philip chate hinkhuo hi ettawntak tak ahiu hi. Amasan nungak thiengtho ahinhau hi gen masai tiu. Nungak thiengtho leh tangval thiengtho I Bible in ana gen dan akipat in a umzie I het uh ginchk aum hi. (Mat. 1:23; Isai 7:14; Thilsiebul 19:8; Luke 1:34) zie Bible chang

haw apat in nungak thiengtho umzie hethei hitiu. Mari'n Vansalchak kawm ah, "Zie haw chuh bang tin ahi thei die, nungak thiengtho ka hi ngal a." a ti a. Nungak thiengtho leh tangval thiengtho chuh, numei leh pasal a kisubawklo te ahiu hi, tih imu hi. Zie ban achuh lungthim a le thiengtho hi ding ahiu hi. Philip thagau thiengtho leh chitna adim mi minpha hin chanu li Pathien thu gensek anei hi. Philip guola cha Pathien thugen zing zing bang tidan in inei thei dem? I Bible in tihin eina hilh hi, Thuchingte 22:6, "Naupang chuh a chiehna ding tak lampi chuh sinsak leh chin, a hung upat tieng lele thahtham lo ding ahi."

Chun, Bible dang dang khat et beh hitiu:

"Chun, nanguh pate haw, na chateu sulungna kiu inla, Lalpa thununna a leh, a hilhna achun seilet sak zawu in." - *Ephesi 6:4*

"Pate haw, na chateu sunuok kiu in, dān leh dawilawk kha'n au." - *Kolosa 3:21*

"Phachuomngai takin na chateu sinsak un la, In a na chut lai un le, lampi a na chieh pet

un le, na kuol tieng u lele, na thawh tieng u lele na gen gen sek dinguh ahi." - *Dannihna 6:7*

"Mawlh mang lo mi chuh chapa lungsiet lo ahi a, himahleh, a lungsiette vang chun taima takin a thunun sek ui." - *Thuchingte 13:24*

Awle, nulepa deihum takte Chanchinpha genpa Philip in nungak thiengtho leh Pathien thu gen sek cha li anei I mu hi. Abawn ua nungak thiengtho leh Chanchinpha gen a siem vek mai hi chuh a thupi na lawm lawm mai e maw? Ettawn a tak na mai zen e. Nang leh kei inle zie tawbanga cha thiengtho leh Chanchinpha gen ding I sawl dawk apawimawh tai. Philip in chuh a cha neih cheng khat le sitlo in a siem/sawl dawk thei a, en khat bek missionary leh pastor dingin sawllo ding I him? Naupang thiengtho leh chanchinpha gen ding I deihtak tak chanu, naupang chu a chiehna ding lampi chu kawkmuh ah zie lampi chu petmang san lo ding ahi, tih I Bible ahin I mu hi.

"Pathien thu hi a hing a, thil a hih thei a, chemzâm hiem tuok sangin le a hiem a, hinna, thagau leh guh kisuktuoohna,

theng sukhen thei hiela sun
thei ahi; chuleh, lunggel leh
lungthim ngaihtuohte hetuok
pai zieng thei ahi.” Heb 4:12

“Chun, nanguh pate haw, na
chateu sulungna kiu inla, Lalpa
thununna a leh, a hilhna achun
seilet sak zawu in.” Eph 6:4



“KA LAK U A NA TEL ZING LOH DINGA AHIH CHUN ...”

Pawt. 33:15

Pr. Khailalsiam

Kum 2019 kum tawp lam chuh USA leh Iran kal ah, kihetthiem lohna a sang mah mah mai a, a chanchin hezaw te chun, Galpi 3na ahung tung mai ta dem ti a, dipchak tak a, a um lai tak uh ahi. Chun, Australia Bush Fire (Gam kang) ziek in buoina nasatak a um kit hi.

Kum ahung thak ta ngei a, Guoh ahung chin a, hai zieng talo in, khenkhat te vang chun, ‘Kum 2020 hih July tha a kipan ahi ta hih’ tilawi bang ana um ui. Chawmkhat zawh in, khawvel a natna ana kihe khalo, Wuhan, China gam apat in, ‘Novel Corona Virus’ ahung pawt kit a, khawvel mipi’n a buoipih mah mah uh khat ana hi kit hi. Kum 2020 tha nih le kimang nai lo, lungthim khawih tak

tak buoina khat zawh leh khat hung um zel hih, lunggil tako I ngaihtuo leh chuh, khawvel hih thamuon umlo mah mah mai chuh ahi ta a, bang tin kum I mangto zel dem tih hi lungthim sukha mah mai chuh ahi tai.

Pawtdawna Lehkhabu hih Nicheng ka Bible simna ah ka sim lai ahi a, Kumthak 2020, January 1, zingkal vaima tak

in Ho In ah Pathien masanga kipumpiekna leh Lalpa'n kumthak bangtin ei puizel ding ahi die aw... ti kawm in pauchamna hun nuom tak ka va mang hi. Pauchamna ka neih zing lai in, ka lungthim in I Bible changtel - "Ka lak u a na tel zing loh dinga ahih chun, zie apat hin ei puito ta kin" Pawt. 33:15 hih chientak in, muhtheih khawp a chien in ahung kilang hi.

I Bible changtel hih, Isaraelite Canaan zuon a chieh zing lai uh a, Sinai tangbul a thil tung ahi. Mosi chuh Pathien in Tang ah Dan leh Thupiek la dinga saptoh ahi a, ahung kileh hak tak ziek a, mipite chuh ana lungthuoi hi ding ahieu a, Aron kawm ah 'Khai, ka mau pui dingin pathiente ei siem sak in; zie Mosi Aigupta gama pata ei puidawkpa hi la a chanchin ka he ta puoh ngal un' atiu, (Pawt. 32:1).

Aron inle a pathien ding uchun, Bawngno lim' ana siem sak a, amau haw chun 'Aw Israel te, ziehaw hih Aigupta gam apat a ei puidawkpa, I pathienteu chuh ahieu hi' atiu a. Zie thil chun, Pathien a sulungna ten ta a, Israel mipite chuh sukmangthai anuom hiel ta ahi. Mosi'n Israelte ding in, 'Amin lehkhabu a ziksa thaih

mang ding tieng in ngaihdam ana ngetak hiel hi (Pawt. 32:32). Mosi mah in, Lalpa Pathien kawm ah ngetna dang anei kit a, "Ka lak u a na tel zing loh dinga ahih chun, zie apat hin ei puito ta kin" Pawt. 33:15

Zie thuguol hih, tukum 2020 imat toh nau a, I paucham nau leh I ngetnau hileh tih hi ut aum mah mah mai hi. Lalpa tello a muhlo lamsau hawh to ding hi chuh a ngam kuomah um ding in ginchat a um puoi. Bang ahim tia, kuo ahim khat in lunggel leh ngaihtuohna senglo a, lung hin – khau hin a hing ahih sam lo chun, Lalpa umpihna leh kitawnpihna chuh ngaina mah mah ding a hi.

Tukum I mat toh nau ahin, mimal tin, inkuon tin, sapchuom tin in, "Lalpa tukum chuh - Ka lak u ana tel zing loh dinga ahih chun, zie apat hin ei puito ta kin" tin paucham chiet leu hin chuh, Lalpa umpih na chang zing hitin uh, a mah deihdan in hung khawsa to hi tin un, Mosi'n Lalpa kawm a agen guol in '... Lei chunga mihing chengcheng te leh na mite kihetkhen theihna chuh, nang ka kawm u a na um sek hi hilo ding ahim?' Lalpa umpihna

I chan tieng uleh, midangte, Inkuon dangte, sapchuom dangte tawh kihetkhen theihna chuh I chung ua hung kilang ding ahi tai.

Malai mithiengtho Josephe, Daniel te, Peter, Paul leh gensienlo tamtak chieh masate haw midang tawh aki batlohnau chuh Lalpa umpihna'n a chan ziek uh ahi vek hi. Lalpa umpihna leh puihna changte chun chuh midangte tawh 'kihetkhen theihna'a nei sek ui.

Zie ziekchun, nang leh kei le, Lalpa umpihna leh pawlina deih in, Amah lam khuot tun

tun hitin hileng, Ka lak u a na tel zing loh dinga ahih chun, zie apat hin ei puito ta kin tin, Lalpa kawm ah ngen in, Amah umpihna khawthe ngaitak in ngak zing le hin chuh, mi dangte tawh kihetkhen theihna bang ahim lam bek ah I chang uh kinep aum a, chun tukum hin bang hun tun ta lele, chawldam leh thamuong tak in kum hih mangchai thei ding ihiu hi.

Kum tung a Lalpa umpihna changa, lam chuom chuom a Amah umpihna ziek a kum lawting taka imat deihsakna ka hun lan hi. Lalpa A thu ei vangsak sak ta hen.



KIPAWLKHAMNA

Rev Dr Ellien Gangte

Thuthun Thak ah 'Kipawlkhawmna' umzie chu Semkhawm a, Haksatna leh Kipahna haw genkhawm a, kipanpih tuohna ahi. Guol-le-pai hi mihing kingaihnatna zal ahia, Kipawlkhawmna hi thagau lam kilainatna leh Pathien hehpihna apat ahi.

1. Kipawlkhawmna Thutak: {a} Gingtute Kipawlkhawmna: "Mi tamtakin a thugen chuh a gingchau a, baptisma a chang u a, zie ni chun mi, sangthum vel behlap in a um tau hi. Amau haw chun a hunteu chuh, sawlchakte kawma thu zilna'n a mang u a, kivawp khawm in, chângthâk phelsuoh in, paucham in, phachuomngai takin a um zing u a. Nasepte 2:41-42 {b} Pa leh Chapa tawh Kipawlkhawmna: Chun, ka muh uh leh ka

zakteu chuh nang haw kawmah ka phuong uh a, khutia chuh Pa leh A chapa Isu Krista tawh ka kivawpkhawmna chuh nei kikawppih theihna dingun. 1Johan 1:3 {c} **Thagau Thiengho tawh Kipawlkhawmna:** Lalpa Isu Krista lungsietna te, Pathien hehpihna te leh Thagau Thiengho kivawppihna te chuh na bawn uh a chungah um hen. Amen. 2Korinth 13:14 {d} **Vak apat kipawlkhawmna:** Amah chuh vaka A um banga, ei uh le vaka um I hih uh chun chuh, Amah tawh kivawp khawm I hiu a; chun A Chapa Isu thisan in I gitloh cheng chenguh ei tauh ngim sak ahi. 1Johan 1:7 {e} **Kipawlkhawmna haihsan loh ding:** Mi khenkhatte hih dān guola, I kivawpkhawmna sekteu haihsan diek lo in, kitfkhoh tuoh zawi tiu, Lalpa Ni chuh hung nai tel tel a na het u hin, kihah tîl zawsem sem un. Hebrai 10:25. {f} **Paul in Kipawlkhawmna hetnawpna:** Ka nawppen chuh, Krista het a, A thawhkitna thilhîh theihna chan a, A thuokna kikawppih a, A thihna kibatpih a um leh, Philippi 3:10 {g} **Thimlak ah Kipawlkhawmna um theilo:** Thim a um ngâl in, “Amah tawh ka kivawp hi,” I tih uh chun, lepchieh I gen uh ahi a, thutak chu le I zawp puou hi. 1Johan 1:6

2. Kipawlkhawmna Gah: {a} Sapchuom khantohna: Hukdamna aum mi 3000 kibehlapna in, amau haw chun a hunteu chuh, sâwlchâkte kawma thu zilna'n a mang u a, kivawp khawm in, chângthâk phelsuoh in, paucham in, phachuomngai takin a um zing u a. Nasepte 2:41-42 {b} **Pathien sapna:** Pathien, A chapa Isu Krista, I Lalpau tawh kipawlkhawm {pumkhat hi} dinga nang haw hun sampa, Pathien ngêi chuh taksan ding ahi. 1Korinth 1:9 {c} **Sukthienthona:** ...Amah chuh vaka a um banga, ei uh le vaka um I hih uh chun chuh, Amah tawh kivawp khawm I hiu a; chun, A Chapa Isu thisan in I gitloh cheng chenguh ei tauh ngim sak ahi. 1Johan 1:7 {d} **Kipahna bukim:** Chun, ka muh uh leh ka zakteu chuh nang haw kawmah ka phuong uh a, khutia chuh Pa leh A chapa Isu Krista tawh ka kivawpkhawmna chuh nei kikawppih theihna dingun. Ka lawp uh a bukim theihna dingin, zie thu haw hi na kawm u ah ka hun zikuh ahi. 1Johan 1:3-4 {e} **Hetna bukim:** Taksanna a nang haw tawh I kivawpkhawmna chun, Krista tawh kipumkhatna zâla hamphatna hung um chuh, het thuk zawksemna a tun theihna

dingin ka paucham sek hi. Philemon 1:6) {f} **Lung khat a umna:** “lungthim kibanga um in, hehpihna kibang nei in; kithutuok a lungkhata um in, ka kipakna subukim dingin ka hun nget na hiu hi. Philippi 2:2 {g} **Hehpihna hetthiem:** Chun, Jakob leh Peter leh Johan lawiupa deuhte chun vang, zie nasep hi Pathien in ei pie chuom bîk ahi tih a heu a. Zieziekchun, sem khawm vek ka hih uh melchikna dingin, Barnabas leh kei chuh khut changlam in ei chibai uh ahi. Galati 2:9. Sapchuomte Pathien Thu leh La a kipawlkhama zalin gahsuohna aum to zel ahi.

Kipawlkhawmna nasep: Rome Bung 16na ah Kipawlkhawmna apat a, nasepna chuom chuom muh theih ahi. Sapchuom a zenvielna nasep: I suohpihnuu, Phoibi, Kenkria khuo a sapchuom haw zenvielnu hi, na deih sak un ti'n ka hun nget na hiu. Ch.1. Panpih ngaite panpih a, mi dangte le kipak taka ana pawm: Pathien mite hih ding bang taka, amahnu hi Lalpa min a na pawm ding leh, panpih a ngaihna chenga le na panpih dingin tawh; a ziek chuh, amahnu hi mi tamtak dingin leh keimah a ding ngeî ale guolpha ahih ziekin. Krista Thisan zala hukdamna changa kipawlkhawmna neite dingin kihehpihtuohna aum tei tei hi. Ch.2. Mi dangte dinga a hinna pie ngam leh midangte chunga kipak zing. Nei hun chibai sak un. Kei mai hilo in, Jentel sapchuom haw lawi cheng cheng in le, a kawm u achun kipahthu a gen ui. Ch.4. Mi dangte chibai nawpna: A In u a sapchuom kikhawmhaw mah kha le ei hun chibai sak un. Chuleh, ka cha deih tak Epainetas, Asia gama Krista a gah masapen kha le nei hun chibai sak un. Ch.5. Gunchuh taka nasep: Nang haw dinga semgim nu Mari kha le nei hun chibai sak un. Mi piengthak diktak chu thadah ngeilo ding ahi. Krista hukdamna zala kipak a, sep ding dawl hechien a, gunchuh taka a sep dinguh chu a nasep dinguh ahi. Ch.6. Mi dangte tawh thuokkhawm: Gingtu diktak chu amah awnna ding ngawn hawlin a kilep lep ngei puoi. Haksatna mun ahle a gingtu chankhawmpihite tawh thuokkhawm a nuom u a, a kiphal ui. Chun, ka Juda chanpihite, Andronikas leh Junias, ka suongkul lutpihite khah nei hun chibai sak un; amau chuh sâwlchâkte laka minthang tak a hiu a, kei sanga Krista a um masa ahiu ui. Ch.7. Thubuoi siem haw entha zing a, amau akipat kikieng kawih: Chun, suohpihite, kithu-

hilhna thu, nangmau haw na dawnsa ngei te, kah lama kikhenna leh pukna siemte chuh vengpha ding leh nungngatsan dingin ka hun nget na hiu hi. Ch.17. Thu-awihna nei a midangte melhet: Chanchinpha lama na ginum danteu chuh mi chengcheng het in a kithang suok ta ngâl a. Zieziekchun, nangmau haw chung thu achun ka kipâk hi. Zieziekchun, thilpha lama na chit theih u a, thil phalo lama na mawl uh ka deih hi. Ch.19. Mi dangte tawh kipakkhawm: Keimah leh sapchuom haw chengcheng tunna pa, Gaia chun a hun chibai na hiu hi. Khuo a sumvawppa, Erastas leh suohpihpaa Kurtas chun a hun chibai na hiu hi. Ch.23. Kipawlkhawmna zalin nasep chuom chuom a sukhat in I um sek u a, kipawlkhawmna hih ngaihawk ding ahi. Amen!



KICHENNA PUON SILHLO

(Matthai 22:1-14)

*By : SM/Clk Paukhogin
Mantripukhri, Imphal*

1. Pathien in Adam nakguh lak apat in a kithuohpih ding leh a panpih ding in numei a siema, amin ding in Evi sa'n, azi ding in a pie a. Zie chuh pasal leh numei kala kichenna masapen ahung hi tai. Zie apat chun suon leh pak ahung kisep zaka, chi leh nam, khuo leh insung ahun siema, cha leh nau ahun hing a. Zieziekchun, nupan kilungsiet takte'n Insung nuom leh thamuon um ahun siemdawk ua, chate ding in thamuon a um a, a damsung un, lampi dik leh diklo

a khentiem ua, a thagau un hukdamna lampi a petmangsan kha ngei puoi, a thawmhauh leh a lungkham ni'u inle a siemu a tudet zing sek ui. Pathien thagau in a chen khum Insung apat chun gam leh Nam ading in malsawmna leh vangsakna tuntu, cha leh nau ahung pienga, zieziekchun, Bible in, kichenna hi a ngaikhawk a, chanchinpha lam kha I et leh Pathien in a gawpsah chuh, mihiem in khen kihen ti'n a zik hiel hi. (Mark 10:9)

2. Khuti ahih ziek chun, khawvel namtin lak ahin kichenna hi chawihsang in aum a, a kipahpihlo le kuomah a um puoi. Mi'n Kichenna programme a guonggalh tiengleh, akitup thei pena mat guo'n ana kisakhawl sek hi. Tangval in a lungsiet tak nungak tawh a kikhutsuih/kichenna ni chuh a damsunga hetngilh ni umlo ding khawpa thupi leh nuoma mat chuh a duhthusam leh a tup pen ahi. Zieziekchun, a guol leh pai leh a ngaihnat a insung mite chiel in guolvakna ahim ahihlohlleh thingpi leh nektheih bek a guonggalh sek hi. Zie haw hi malai apat a, I na chiehpih dan uh ahi a. Ahin tuni hin, Lalpa Pathien in khawvela a sapchuomte (Kristiente) hi Krista Mo hidinga bangti a a guonggalh ahim tih en hitiu.

3. Matthai Bung 22, lam khah I sim leh, leng kuo ahim khat in a chapa zi neihna ah guolvakna thupi tak a siem I mu'u a. A chapa neihsun ahih ziek in alopi thei pen ding in a guonggalha, a neihsa laka it umlo in, Guolvakna a siema, alimthei pen ding in a suokte kawmah a pie a. Zawh ahih phet in, a ne ding in, a mi chielte samding in a suokte a

sawla, "Ngaitiem u, ankuong ka siem zo tai, ka Bawngchal haw leh ka gan vak thaute ka that a, bangakai zawh ahi tai, anne ding in hung tau in," ti'n a ti a. Himahleh kuoma'n ana bengkhawn puou a, amau pawimawhna chiet ah, a chieh ua. Khat chuh lo ah a chieh a, khat chu a sumkawlveina ah, khenkhat in a suokte chu aman ua zahhuoi tak in a that ui a ti a. I ngaihtuoh leh, bangti'n Lengpa hin lung agel dem, ei suzahhuoi un ei suhmuolphonau e, ti tei in a. Ei kihi leh, I suokte kipui intin, a chung ua gawt na ding kihawl ut mai ding in ka ginglah puoi. Chang 7 na kha I et leh, leng chuh a lung ana ta a, a sepaih a sawl a, zie tuolthat haw chuh a sumang a, a khuo le a halsak ui, a ti a. Khutia, a mi chielte anne tak a umloh ziek in, a suokte kawmah lampi leh lamkathuom haw ah chieh unla, mi na muh takphawt u chuh, migilo hileh, mi pha hileh, guolvakna ah, an ne ding in hun puikhawm un a ti a. Tichun, a mi sapteu ahung dim ta a. A sapteu en dinga ahung lut phet in, kichenna puon silhlo mi khat a mu a, a kawmah, "Zawl bang ati a nang in kichenna puon silhlo

a taka hi hunglut na hi?” a ti a. Himahleh, amah chuh a thipkei a. Leng chun a suokte kawmah a khut leh a keng ka’n unla, pawlam thim ah paihdawk un; zietak achun kah leh hagiel um in a, a ti ta mai a. Mi zie zahzah laka zie pa khel khel hin kichenna puon a silh leh a silhlo a kihet dawkloh hiel hi maktak ahi. Kihedawk henla, ngaihtuoh masa thei leh lengpa lungnatna a chunga tung dingin gingchak aum puoi.

4. Suohpihte, ngaihtuoh tie, pienthakloh apawimawh dan chuh. I damsung in haksatak leh gimthei tak in khuosa’n, ahihloh leh alim lim ne’n a chawldam thei pen in I nitin hinkhuo mang in, I veng I khuo leh mite’n ei dawtpen leh a hepen guol in mi’n ei ngai leule, kichenna puon I silh loh chun ahawm ngawn pawlam thima paihdawka um ding tihna ahi. Ziete haw chuh Pathien guolvakna lak ah tel leule paihdawka um ding ahiu. Nikodem kha le piengthak lo ahih ziek in, khuovak lai in Isu kawm a chieh ngamlo in zan in a chieh a. Lalpa Isu’n a kawm a “Tihtakzet, Tihtakzet a ka hilh na hi, mi kuole a pienthak loh chun, Pathien gam muthei

puo’n au” a ti a. Nikodem in a teknung in bangti’n, a nu gila nihvei lut in a pieng kit thei dinga ahim?” a ti a. Isu’n tui leh thagau a apien loh chun Pathien gam lut thei puo’n au ahun ti kit a, (John 3:1-13). Nikodem tawh a kihonau apat in Lalpa Isu’n Pathien gam lutna lampi chientak in ahun genchien a, Tuisika pien mai hih senlo in thagau ale I pien tei tei dinguh ngai ahi tih ei hun hilhchien a. Zie hi ahi achielte kivanna puon silh ding chuh. A sapchuomte hila kichenna puon silhna ding kham a thu helo mawng mawng le ki-um talo, athu kihe tam deuh deuh kingaihsak lo deuh deuh guol in alang in akhawk mah mah mai hi. A sapte hi I et leh a kisuthiengtho peih le ki-um mah mah talo, mahni hindan dana I hin leh lungkim mai, Pathien thu hile thuk deuh in kingaihtuoh henla, a hehpih/ lungsietsna haw hi bang tienga thuk leh lien ahim tih kingai pawimawh deuh leh Pathien in hetchetna lungthim haw hile itlo hiel in ei pie’n a tih ka ginglah hiel puoi.

5. I Biel leh Sapchuom sunga, I lawiupate, Pastorte leh Speakerte’n thu a gen tieng ueleh a thugen uh dik I sa chiet

ua, ahi a chuh ei ah lamdanna, kithenna, leh a hinpih guo ki-um mah mah ta sek lo. Mi'n thu pawimawh tak tak a gen u leh, hah ngaih in I ngai ua, ahi ngaih ding leh nek ding him ahi. Khenkhat vang vang a gen zawh leh angei ngei hi kit zel, a gah ei a muh ding mawng mawng um lo, a thugen abei le abei hi ngal. Khutichuh hizaw lo ding ahi, a neupen apat a lienpen tieng in kei ahin bang pailthak ding leh behlap ding um ahim kiti zaw thei leh I gam leh I Nam sung hile kihung duohdawhthak kit ding in kinepna lien tak um in ka muzing hi. Unaute, mi'n Krista zal in muhsit, gensiet leh zep leh minsiet thuok ding hileu le, kisazosa'n a kipumpiek ua. Pathien nasem tamtak in chanchinpha ziek in anu, apa leh a insung mite taihsan in a hinna tingle chan ding hilele Krista zal in Setan gal a sat in a damsung niteu a mangbei ua. Ei haw la, I ut uh

leh I kikhawm ua, mi'n thu gen dinga ei guot uleh, I gen ua, khawmpa a chieh ding a tih u leh thu mangtak in I chieh ua, mun chuom chuoma Pathien thu ngaitha'n I kikhawm viel viel ua, zalen tak leh anuom thei pen in chanchinpha I hawl

ua. Programme chenga I tel loh leh, hi theilo guol in I ngai ua, Sapchuom sunga Department chuom chuom- LCC, SWS leh KKP vaihawmna sunga le afelpen leh akitup pen a lang ut zing mai, ahi a chuh kichenna puon silh leh silhloh lam him him ngaihtuohna man le nei thei talo khawpa a sapchuom buoia I buoi mai hawu hi ahi I buoinau. Zie haw hi haihsan hitiu I tihna ahi puo a, sapchuom phatna ding leh masawnna ding ahih phawt chun zie haw sanga nasazaw chunle sem in buoi hitiu. Ahin suohpihte khawvela um hileu hingle khawvel mite I hi ta puo a, Lalpa Isu'n a thisana ami hidinga ei tat uh, ei chawk uh ahihtak ziek in, khawtitak muna um in na sem leuhing le, I thagau hukdamna (Kichenna puon I silh uh angai hi) tih hi apawimawhpen in ngai phawtphawt leuhing Lalpa'n ei tawhthak hun um tei tei ding ahi.

6. Sapchuom hi Pathien thagau pawlina kichang henla, thagau lam ah kihat leh, tih hi Sapchuom mipite tup leh I nasep pipen uh ahi, zie chuh ahi Krista Sapchuom I hihnau melchikna lienpen chuh. Zieziekchun, Sapchuom

lawiupate leh vawihawmte
 hi a mawhpuoknau alien a,
 a kithadah maitheih ding
 uh ei puoi. Mipite hi thagau
 hukdamna kuonga puihlut
 leh puihlut loh hi amauhaw
 mawhpuokna a kinga ahi.
 Khuti ahiah ziek in tihtakzeta
 athaka pan I lak tak tak uh
 angai hi. Khenkhat thagau
 lama I fellohnau le um in a,
 I fellohnau leh I min tak tak
 lohnau bang ahim tih I kihet
 u chun, amasa'n ei mah I
 ki-etchien masak phawt loh
 u chun Belamte hi Pathien
 deihbang tak in enkawl zo
 puoi ting un, duhthusam
 bangtak in hukdamna kuong
 ah puilut zolo ding I hiu. Zie
 tawbang Sapchuom chuh ahi,
 ding zing leule athi ahi, Lalpa
 Isu'n mitduk in, mitduk mah a
 puihuoi chun kuokhuk ah s kie
 lut sek ui a tih guol khah hiding
 I hiu. I gam leh khuosung leh
 Sapchuom sung I et tiengleh ka
 lungthima dawtna hung kilang
 masapen sek chuh, Bangzieka
 Sapchuom dangte'n Pathien
 thu a gen banga I Sapchuom
 lawiupte'n gen lo, Pathien a
 ngaihnat guol ua, ngaina lo, a
 paucham guol ua, pauchamlo,
 Pathien thu a het guol ua, helo,
 nungak-tangvalte'n Pathien
 pahchakna la a sak guol ua

ei haw'n kisa thei lo, nu leh
 pate alam guol ua, lam thei
 lo. Pathien thu hi, Upate'n
 paunaka a gen guol ua, "Thing
 umlo na ah guo akimang hi" a
 tih guol ua I mat uh ahi ta dem
 maw!, ti'n ngaihtuohna tamtak
 ei siemsak sek hi. Zie guola
 thagau lam taksapna haw hi
 bangzieka ei haw mitawmchate
 chung hi tung ahi ta die aw?
 Ahihlohleh Pathien in ei
 nungngatsan houh ahi ta dem
 maw! ti'n aguk in lungthim
 thawmhauhnna lien tak ka
 na nei sek hi. Suohpihte, I
 khanmawh bawk uhi, bang ahi
 ta die? ngaihtuoh umtak ahi.
 Taksa lam ah suon ding I nei
 puou a, thagau lama ei sukhalh
 thak ding leh I beidawnnau,
 I thawmhauhnau, I gilkiel
 leh I dangchaknau leh nek
 ding dawn ding, ei thamuon
 ding Belam chingpa pha I
 gam in a mamawh takzet tai.
 Kithalak belam chingpa hilo
 in, Belam chingpa pha, belam
 chingpa pha'n a belamte a he
 a, belamte'n le a pu a he'u.
 (John 10:1-16) a tih guol khan.
 Unaute, I chi I nam I lungsiet
 chun thutak gen in, ginumtak
 leh diktak tak in Lalpa na hi
 semding in athak in panla'i tiu,
 I umna chiet ua, ei mau leh ei
 mau I kitathiem thak uh angai

in ka he'i. A khutihloh chun ziehaw sanga haksatna leh gimtheihna Lalpa'n I chung ua, tunsak thei ahi tih hengilh puoi tiu. Unau khenkhat vang vang lungthim mumal le nei thei talo in huoiham tak in aveilam leh achanglam ale pang ut, ne ut, pahitha nuom mah mah lo, mi'n zie lam a tih uleh zielam a chun a kihei zel ua. Khat in zielam zaw hi ahi ie ! a tih leh delh zel, lungthim mumal neilote guola um talo ding in, I vawt leh vawt hi ting un, I lum leh lum ding in, athak in panla'i tiu.

7. Isrealte hun lai khan le lungthim mumal a neih loh ziek un Pathien a chung u ah a lung a na a. Zieziekchun thiemgau Elijah sawl in Kemel tanga khan Israelte cheng cheng leh Baal thiempute mi zali leh sawmngate kha samkawm in Lalpa Pathien fieh ding in Lalpa thiemgau Elija'n chona a siema, mipite kawma khan hitin hin a gen a, "Lungawpkaia bang chan a na um ding uh? Lalpa chuh Pathien a hih chun zui unla, chun Baal chu pathien a hih chun amah zui un" (1 Lengte18:21) a tih guol in, tuni hin Krista a ka suohpih deihtakte lungawpkaia um zing hun ei ta

puoi, atak taka sep hun ei tai. Khawvel mi I hihna leh I dinmun pawimawh tak tak, I khuo I veng haw'n le amau lawkna ding ahih ziek mai chauh a ei pahchak lemma hawu mai mai ziek in lungkim mai puoi tiu. Zie haw hi I hetloh kala thagau lama ei daltu a pang ahi nuom zaw sek hi. Zie haw hi I taihsan ngamlo u chun dan leh I inkuon ua kichenna puon silhloh a I um khak ding uh hi alauh um zaw ahi. Zieziekchun, Joshua'n a suohpih leh Isrealte kawm a khan, Lalpa nasep hi phalo guola na ngaih uh ahih chun, tuni hin tel un kuo na ahi nasep ding uh, na pulepateu in luigala a na a sep uh pathien haw khah ahim, na chenna gam ua Amor te pathien haw? Kei leh ka inkuonte hin chuh Lalpa na ahi ka sep dinguh" (Joshua 24:15) a ti a. Chona lopi tak Isreal mipite kawma khan a siem a, mipite khan, Lalpa Pathien chuh nusieh in nam dangte pathien na sem hiel puo'ng kau a tiu a. Chun Joshua'n a kawm u ah, amah chuh Pathien thiengtho leh thikthusie ahi a, na bawhsietna hawu leh na gitlohma hawu hun ngaidam puo'n a ati a. "Hilo e! Lalpa na ahi ka sep ding uh a

tiu a. Joshua'n khuti ahih chun na lak uh a namdang pathien umte chuh kawihmangkei unla, na lunggil un Lalpa Pathien lam achun kihei un a ti a." Unaute, tuni hin ei haw'n le, Pathien lama I lunggilteu hei in ngaihdam ngen in, kisikna lungthimpu kawm in a kawma thupukna dettak siem leuhing I gitlohnau lunggel haw hi vuimang ding leh ngaidam dinga kisazo sa ahi tih hengilh puoi tiu. Zieziekchun Lalpa hatna leh a thagau thilhithelhna haw hi mawk mai a kawih lo in, amah suong in kisikna lungthim I siem kin lo u chun, dan leh mihausapa guola meidila kihedawkte I hih khak ding uh alauh um takzet hi.

8. Mi'n Krista a muhchien tiengleh zie khawvel lopina leh hausaknate pakbang tuoi ding sangin ka Lalpa hi a hawih ka sapen e! ti'n Krista a tel zaw sek ui. Khatvei Tennyson in a khuo, Lincolnshire apat in khawvel pumpi fang suok ding in a kipandawk a. Ni bangzat ahim nung in akhuo ahung tungkit a, a guolte'n ngaklah tak in ana thil zing ua, ahung kit tai tih a het het un, a kawmah a hung ua, a kawm ah banga na khuolzinna chanchin thak

hilh thei ding na nei em? ti'n a dawng ua, a guolte chuh a thu genkal ngaklah tak in a bil uh adawh chiet ua. Tennyson chu a dingdawk a, "Guolte haw, Isu chuh a thi a, Isu chuh a thokit a, Isu chuh hung kit ding ahi, aman a lungsiette hung puikit ding ahi, ati a, a chu kit zieng a. A guolte chun, "Guolpa, tua na thugen chuh na chieh masang peka khah ka het vek uh ei tai. Na khuolzinna a na thilmuh haw ngaitha dinga hungkawm ka hiu" a tiu a. Tennyson chun, "Guolte haw ka khuolzinna gam achun mi lopi tak takte ka mu a, Lal Isu sanga lopi mawng mawng ka mu puoi. Thilmak tamtak ka mu a, Lal Isu sanga makzaw mawng mawng ka mu puoi. Thugen ngaihnawp um tamtak ka ngaitha a, Lalpa Isu'n ka kawma a thugen sanga ngaihthak nawp ding mawng mawng ka he puoi. Etnawp maktak tak ka mu a, Lal Isu sanga etnawp ding mawng mawng muhbeh ka nei puoi. Zieziekchun khawvel hi ka fang suok a, chanchin thak pen ka hun puok sak chuh Lal Isu chanchin hi a hi e" ti'n a chu kit ngal a. Unaute, alopi na maizen e maw! Khawvel thilmak leh lopina haw leh sana-dangka, hausaknate

haw cheng cheng sang inle, ka Lalpa hi ka ngaina'n ka tel zawi ti thei chiet leuhing, Tennyson muh guol in ei haw'n le kimuchien henla, kihechien thei le chuh, Lalpa phatna leh a thilhihtheihna leh a lopina haw hin I gam leh I nam hun zemhawih thak ding in kinepna lien tak um in ka ngaihtuoh zing hi. Lalpa'n simtute **cheng cheng** athak in I umna mun chiet u ah ei vangsak tau hen, Amen.



Malam Zuon Zêl Hitiu

Philippi 3:16

Evan. Paulienkap T. Gangte

Malam zuon I tih leh thil chuom chuom a malam zuot theih ahi a, chuleh lam chuom chuom a le hilhchet theih ahi. Malam zuon I tih leh malam mâwk zuot zieng hilo in, mahleh tunna ding khat leh tup khat nei a malam zuon tih a hêt leh lâk ding ahi. Sâwlchâk Paul ngîi le tunna ding khat nei a malam zuon ahîh dân amah kamsuok ngîi apat zâk ahi, “**Khutichun, kisuktuohna a pangte guolin hâwm ngâwn mai neklo in ka bâwl a, bidawih nei in ka tâisek hi,**” atih (1 Kor. 9:26). Etsakna'n, Israel chate'n Aigupta apat in lei Kanaan gam a zuon ui. Football pêkte'n le gâwl (goal) khum ding tup in malam a zuon ui. Lobâwl mite'n le lo-et akipat buh-ât tiengin malam a zuon ui. Lehkha simte'n le kindergarten apat graduate, master, leh doctor degree tieng zawh tup in malam a zuon ui. Kung kânte'n le kân sangto zêla a malam a zuot uh ahi. Zie guol chun, ei uh gingtute hile ginna a malam vân Kanaan zuon a chieh zêl I hiu a, chuleh masanga kipahman (prize) um chuh muh guo I hiu ui. Malam zuot zêlna ding leh kipahman muh theihna dinga thil pawimawh khenkhatte chawmkim takin ana en hitiu.

1. Ginna (Faith). Ginna leh taksanna tih thumal hih a matdân kibang ahi a, mat tuok tuok theih ahi. Ginna umzie hih Bible vak hilhchet sak hitiu, “**Chun, taksanna hi kinepna thil haw**

hêtchienna, muhloh thil a um mâwng hi tih phawtchienna ahii” (Hebrai 11:1). Malam, hêt khâkloh leh muh khâklohma gam zuotna dinga thil pawimawh tak leh mamawh masape’n le ahi. Ginna lien nei nei hile a lawhting pe’n le a hung hisek hi. Kanaan numeinu taksanna neih bang hin taksanna kinei chiet le chuh ahi theilo umlo ding dân ahi (Matthai 15:28). Isu Krista ngéi inle ginna thilhithieh zie a sinsakte kâwm ah ana gên him hi: “**Tihtakzet a ka hilh na hiu hi, ankam mu changkhat tieh taksanna na neih u chun, zie tâng kâwm ahin, ‘Zie taka pat hih zie khun va kichâwn ah,’ tiu in na tin uh, kichâwn zieng ina, nang u dingin hihtheihloh bangmah um puo’n a,”** a ti a (Matthai 17:21). Tuchung khanglâi khâwm MPI khan ginna nasep kilang in ka muui. A hun ding kuon chan in guohte zu mahlele, ginna’n I paucham u a, I na zuon tûn tûn u ahi. Tichun, Pathien in A vân tukvelh chuh I khâwm MPI sung cheng u a dingin ei khâk sak ta ahi. Ginna a vân Kanaan zuon leh masanga kipahman um chu delh I hiu a, ziekchun I taksan kinepnâu hi a lawn loh na dingin tuchak zing hitiu (Hebrai 10:23).

2. Hâtsâwtña (Stamina). Hâtsâwtña tih chuh châwl hak, châu hak, ahihloh leh châwlh kîi nunga le tha piek theihna tihna ahi. Taksa guolsiek a guol zawhna dingin hâtsâwtña neih a pawimawh hi. Hâtsâwtña Neilote chuh bangti’n thiem (talented) mahlêule, a pawimawh hun takin a hung châu u a, tichun guol zawhna a chang thei sek tapuou ui. Zie stamina hih pienken a um zieng hita luo lo ahi. Mi khat chuh a hât chi deuh a hung pieng zieng um ta lele, a kisukhât zel loh leh tulâi hin guol phâk zawh ahi tapuoi. Taksa hâtsâwtña hih lam nihin a neih theih hi. Lâklût leh kawihthâk na a pata neih theih ahi. Lâklût tih chuh ei mah in I sepawk theih tihna ahi a, kawihthâk tih chuh thilchiin phalo, taksa suchâu theite kawihthâkna apat a neih theih tihna ahi. Lâklût: etsakna’n, taksa kisukzawina (exercise) leh an pha néknate apat stamina neih theih ahi. Etsakna’n, football pêk ding chuh a taih hât leh a châwl hak a ngâi hi. Zie taih hâtna leh châwl hakna neih theihna ding chun, PT taih mun a pawimawh a, chuleh football kichep mun le a pawimawh hi. Kichepna (game) a danlam dungzûi a, stamina siem dân le a lamdan ngâi zêl ahi. Volleyball kichepna a dingin chawp hât a pawimawh a,

ziekchun chawp hât kizil a pawimawh hi. Kawihihthâk: etsakna'n, chêp le muom, kânja (cannabis), druggs, zu, heroine, leh a dang dangte haw hih kawihihthâk leh taihsanna apat a neih leh vêntûp theih ahi. Chungikna mai mai leh chieh hât theihlohma ding mai mai ahi. Khamtheih a kichiem mite chuh kuomah a hâtsâwt a um thei puou ui. Zie tawguol mah hin thagâu lam guolsiek I taih nâu leh malam I zuot nâu ah hâtsâwt na neih a pawimawh hi. Zie hin, Lâklût leh Kawihihthâk dân taksa a kimang khah a mat theih kît hi. Thagâu lamah vâng a kilehbulh kêt hi. Thagâu a hâtina dingin taksa a hung chauh ngâi ahi. Ziekchun, taksa guolsiek a guollahte chuh thagâu lama a hâtzâwkuh ngâi ahi. Ziekchun, Sâwlchâk Paul in, '**Ka zâwnkhâl cheng leh ahi, ka hât zâwk sek**', atih chuh (2 Kor. 12:10). Thagâu lam gâl I do nâu a, I chauh pai zieng loh a, I hâtsâwt theihna dingun thagâu lam kisukzawina (exercise) pâuchamna, an ngawlhna, leh Bible simnate haw hih I bâwl zinguh a pawimawh hi; chuleh sukgimtheih a umna, zâwnkhâlna, nuihsan a umna, muhsit a umna leh a dang dangte haw hile thuokhât dân I sin uh pawimawh ahi. Khâwmphi a chieh mun, seminar a pan mun, thagâu lam kipâwl khâwmna him him a tel mun leh, a dang dangte haw bâwl zing hin thagâu lam hâtina ei pie thei hi. Kawihihthâk ding I tihna nuoi a hin taksa thilchiin phalo leh sunggil lam gitlohma kawihihthâk ding a um tuok tuok hi. Taksa a thilchiin phalote chuh zu leh a kibatpihte hehna, kipâwlthânhuoina leh, zâwsaihnate haw hih ahi. Sunggil lam gitlohnate chuh: kikhenchuomna, kiletsakna, ma-ângsung khuolna, kigên phatna, duh-âmna, itthikna, mi muhsitna, mahni kingaihsânnna, kigênsietna, lungdamlohma, lungnatna, leh a dang dangte haw hih malam I nawh theihna ding u I kawihihthâk dinguh ahi. Ziete haw hih a giksamai mai ahi a, I kawihihthâk a I taihsan loh u chun malam zuon bun lo ding I hiu ui.

3. Nunglam Ngaihkitlohma. Nunglam ngaih kît tih chuh hung kipatna thalah leh hengilh zo lo tihna ahi. Pathien in a suok, Mosi mang a Israel chate, Aigupta gam a pata a puihdawk a lei Kanaan gam a zuot zing lâi u khan, khenkhatte'n a hung pâwtdawkna gamuh, Aigupta gam khah a ngâi kit uh ahi. **Chun, Israel suonte chun a kâwm u ah, "Aigupta gam a sa bêl bula ka chut lâi hâwu leh, chângthâk vah taka ka nêk lai u khan**

Lalpa khut ah a na thi hizaw mai lêu ing aw! mi kikhâwm khâwm chengcheng hi thaleka gilkiel a suklup ding a nei puihdawk ahi hi la,” a tiu a (Exo. 16:3). Zieziekchun, a chung u ah Pathien a kipak te’ n puoh kha! Ei uh gingtute dinga nunglam chuh ahih leh hinkhuo lui, mihiem lûi, gitloh suok a um lâi, pienthak masang hinkhuo khah tihna ahi. Zie hinkhuo lui ngaih kit chun siet deuhna deuhna ah ei pûilût thei hi, “**Khutichun, na malâi umdân u a mihiem lûi, a milem utna zieka sie deuh deuh kha hâwk dawk unla”** (Eph 4:22). Krista’n le nunglam vei kît leh ngaih kît ding ahihloh dân ana sinsak hi, “**Kuole, lo kaihna a khut châwla, nunglam en kit chuh, Pathien gam mi hi hâwi ahi puoi,” a ti a** (Luke 9:62). Nunglam, suol, leh Pathien helote umna mun thalahte hih gâwt ana hi sek u a, dân tak lele gâwt hung hizel ding ahiu hi. Krista’n, Pathien gam hungtunna ding chungchâng thu a sinsakna ale nunglam ngâikîtte chuh Lot zi manthai bânga a manthâi kît ding ahih dân a gên hi, “**Lot zi hezing un”** (Luke 17:32; Thilsiembul 19:26). Zieziekchun, nunglam veikîtte hin malam a sâwn thei puou a, kungmun (goal) chuh a tung thei sek puou ui. Ziekchun, khuovâk changsa I hih tâk nungin thimplak ûtcha tapuoi tiu.

4. Mêlma Zawhna. Sapte thuching in ti’ n a gên hi: ‘themthiemna tincheng hin mêmra a nei chiet hi.’ Malam zuotna ahin mêmra kilanpih do ding a um chiet hi. A umzie chuh I lawhtitna dinga ei dâltu tihna ahi. Zie chuh I zawhuh ngâi ahi. Lobâwl mite dinga mêmra chuh nisa, guoh, thokâng, thosi, vawt (leech), phalbi, leh adang dang. Nisa a sa taluoi, guoh a zûi, thokâng, thosi leh vawt a tam taluoi tiu henla hileh a tâwp leh buh tampi nêkkhawp neilo ding ahiu ui. A hîn la, zie haksatnate haw hun thuok muolsuoh a malam zuon tûn tûnte chun kumtâwp leh buh tampi tampi a hun nei sek ui. Sepaihte le a gâtéu delh a malam a zuot mai uh hilo in, a sep ding chanuh (pension chan) a tun macheng un haksatna, thununna, kidêkzawhna, leh gimtheihna tampi mêmra a do dinguh um ahi. Lehkha simte’ n le malam zuot ding leh mêmra do ding tampi a nei ui. Sumlepâi haksatna, damtheihlohnna, leh thununna khauh haw um ziek a a malam zuotuh a châwlh mai u chun a tâwp leh bangmah degree hun lazo puou untin, khâm (job) le hun mu lo ding ahiu ui. Football pêkte’ n le goal a

khum theihna ding u leh trophy a lâk theihna ding u a kilanpih (mêlma) chietuh a zawhuh ngâi ahi. Zie guol chun ei gingtute hin le thagâu gâl I sâtuh ngâi ahi, '**I kilanpih u leh I kibuonpih hâwu hih sapum leh thisan ahi puoh a mahleh lalna haw, thuneihna haw, zie khawthim chung a vânnuoi vâihâwm haw, leh vân mun haw a thagâu phalo um haw chuh ahi'** (Ephesi 6:12). I do ding u chuh suol, gitloh, leh a phalo taphawt tihna ahi (Hebrai 12:4). Zie mêlma haw hih ni phalo hungtun hun a I zawh theihna ding u a Pathien gâlvan bukim chuh I kilâk dinguh ahi (Ephesi 6:14-18). Ziekchun, mêlma I zawh theihna dingun Pathien gâlvan thutakna kâwnggâk, diktatna awmphaw, kichamna Chanchin Pha, taksanna phaw, hûkdamna lukhuk, Thagâu chemzâm (Pathien Thu), leh thagâu dima pâuchamnate haw a I kithuom loh u chun mêlma, Diabol chuh neh theilo ding I hiu ui. Sâwlchâk Paul guola guolsiek pha siek thei ding leh siek zo thei dingin kisâi tiu (2 Timothe 4:7). Guolsiek I siek zawh tieng u leh kipahman mu thei chauh ding I hiu ui (4:8).

Ahih leh malam zuon zêl I hi nâu em? Ahihloh leh malam le zuon lo, nun glam le zuon diek lo, umna mun a thâm den kha I hiu em? Khuti ana hih chun I kipat thak kit a ngâi hi. Lam dikah I chieh nâm? Lam diklo a na chieh kha I hih chun, tu hih a then hun ahi. Israelte guol a ginna tasam kha ahim, ana thuokdawl kha ahim, ana châu kha ahim, ana phunchiek kha ahim, Aigupta gam ngâi kit kha ahim, Lot zi guol a nun glam thalah ahim, ahihloh leh pêklûm (football) pêkte guol a mahni kilanpih mêlma neh talo I um khâk palh u chun, Krista ah hâtna lathak in, masanga kipahman um chuh hah delhin delh hitiu. I umnâu lei chung hih I kumsâwt In dinguh ahih loh ziekin thalah lo in malam chuh zuon mèng mèng hitiu. Guolsiek bâwlte banga lallukhuk sie thei mu dinga bâwl I hi puou a, mahleh lallukhuk sie theilo mu dinga bâwl I hih ziekun kithahdah lo in mahleh nasazaw sêmin bâwl hitiu. Chuleh, kal thak sep a Lalpa na I sep theihna tampi le um mai thei ahi. Ziekchun, nâupang etkawlna leh sinsakna lamah ahim, khanglai sungah ahim, women society sungah ahim, missionary nasepna lamah ahim, khuo sungah ahim, sapchuom sungah ahim, ahihloh leh nam a ding ahim a kal thak suon a malam I zuot theihna ding a um dem tih ngaihtuoh thak kit hitiu.

PATHIEN CHUH THAGAU AHI

- *Ngakneu Khongsai*

Amasapen in, Chamna Aw simtute chengcheng kum thak chibai.

Pathien chu thil khawih khak theiha um hita leh, muh le mu thei ngei ding I hiu a. Ahinla, Pathien chu khutibang chu ahi puoi. Isu “Pathien chu thagau ahi” tin a gen hi (Johan 4:24). Zieziechun ei haw dingin Pathien muh chu thil hitheilo tawp khat ahi a, thagau in phehlevo aneih loh ziekin (Luke 24:39). Pathien chu thagau ahih ziekin Pathien chu I kawm uah aum zing hi tih Bible in ei hilh chien ahi. “Khutia chuh, amah a hawl u a, a mai a mai u a, a muh tei na dingun. Himahleh, Pathien chun eihaw ei gamlat puoh ngâl a.” (Nasepte 17:27). Pathien thagau ngei chun mihingte lungthim a musuok kei a. Mite chun pawlawm lat dan apat mihingte chungah a vahawm sek uh , himahleh, Pathien chuh vang lunggil lam en in vai a hawm sek hi.” ti agen hi (I Samuel 16:7). Mihing in midangte lungthim amuh theihloh ziekin, a them thei sek a, ahiloh leh amah le thep in aum thei sek hi (II Timothe 3:13). Himahleh Pathien chu thagau ahi a, kuoman nuihtai in a tha mai thei lo ahi.

Nangmau kithem kiu in! Kuoma’n Pathien chuh a ngawl bawl thei puoh ngâl a. Mi’n, a theh tâk chuh, zie mah chuh ât ding ahi ngâla. (Galati 6:7)

Hiti hin vak suongtuoh leng – In khat ahin an kawihna pindan thiengtho khat aum a, zie mun chu kuo ahim khat in va chieh in, thil phalao khat va bawl ta leh midangte kawmah zie hi kilanglo maitehi ahi. Amah vang chu thil gilo hihte chun Pathien apat kiselna ding mulo ding ahiu a, ziechu khawvaka thu amuh theih guol mah in thim lak ale amuh theih ziekin. (Job 34:22)

Mi khenkhatten Pathien hi Ho-in a um dingin a gel ua, khutichun, Ho-In sung apat apawtdawk tieng uh leh gitlohna hi zalen takin a bawl sek uh a, Ho-In a umsung chun thiengtho taka hinkhuo

mang guolin a kilang sek uh a, zietawbang hindan chu Pathien het thiemloh zieka hung um ahi. Ziehaw ziek hin Jeremiah hunlai in Israelte kha Pathien in ana gawt lawh ahi.

“Gamla taka um Pathien hilo in, nai taka um zing Pathien hilo ka him? tih hi Lalpa kamsuok ahi. Ka muh theih loh dinga mun thip a kisel thei a um dinga ahim? tih hi Lalpa kamsuok ahi. Lei leh van ahin ka dim hilo ahim? tih hi Lalpa kamsuok ahi. (Jeremiah 23:23-24)

Pathien hi mun tina um ahi. I chut leh din uh a he a, I Ngaihtuohteu hi gamla tak apat in ahe sek a, ka umdan cheng hi na he suok kei hi” (Sam 139:14)

Lalpan simtute cheng adingin a thu vangsak ta hen.

Kakipak hi.



PAUCHAMNA A HETDING **LUONGPI PASAL HUKDAMNA CAMP**

Duration: 12th – 16 March, 2020

Thupi : Na hinna dingin taidawk in” Gen 19:17
Speaker : (1) Evan. V. Lienthuom (2) Mr. Aric Lalminlun

Pauchamnan ei na hetpih in, chun atel thei tehi le hung kisa dingin ka hun chiel ui.

Organising Committee thasang in,
Evan. L. Meshach,
Luongpi.

CHAWIHMAWINA CHANNA CHUNGA KIPAHTHU GENNA

By: Upa Niala, Shillong

8th December, 2019 nia Council in CHAWIHMAWINA thupi tak ei vak pieu a, lenna bel khat tawh Memento ngaihsan um tak ei pieu a, zie khel chun deihsakte tamtakin thansuoh puon leh puondum tampi ei silhsak ua, Blanket bang ei pie le aum ua, chun Neihsiel Veng hausate Pu Sata te nupan in lenna bel phatak chientaka zik sa'n ei pieu a. A dang dang inle puondum haw ei silhsak ua, Mission field ah Pu Punshi leh Pu Prem Kumar inle Meitei puon ei silhsak ua, ngaihsan um ka sa mah mah hi. Programme thupitak ei na guon sak ua, Zie khel achun Shillong ka tun un Sapchuom te'n Programme thupi tak ei na guonggalh sak kit ua, lenna bel khat leh Memento kilawmtak ei na siemsak kit ua, zie chauh chu le hilo in paisa Rs. 10,000/- (singkhat) ei pie nalai ui. Ka chan dinga kilawm lo tieng hiel CHAWIHMAWINA ka chan hi ka damsung a ka tuok lakin a lopi pen ka sai.

Shillong ale mimal chuom chuom in puon nei silh sak ua, thilpiek chi chuom chuom nei pieu a. Zie tawbang deihsakna leh chawihmawina ka chan hi kei nei chawihmawinau hilo in, Lalpa Pathien na limbawl nau ahi ka ti lo thei puoi.

Mimal cheng kieng a kipahthu gen seng lo ka hi a, zie I chanchin bu'u ahin kipahthu ka hun gen hi. Pathien in aleh tamtakin hun malsawm chiet ta hen.

Lalpa lopina chang ta hen.



SAPCHUOM LAWIUPATE CHUH!

~Rev. K. Siemlien

Sapchuom a lawiupa ding leh Department chuom chuoma lawiupa ding, tasam lo in tuni tieng in Lalpa'n ei pie a; lawiupa dinga teldawka umte'n a puih ding uh mipi, belamte le ei pie nalai a, amin lopi pahchak in um zing hen. Teldawka umte hih Lalpa'n ahun dungzui a, apawimawh zieka zie mawhpuokna haw hih ei piek ahih ziekin, chingthei tak leh Lalpa deih dan bang ahim tih hezing puma sem dingin Lalpa Thagau umpihna na chung chiet u ah um hen. Sapchuom a vaihawm, lawiupate chuh thilpha deih ahiu hi. Anuoai ahin lawiupa hihna dinga pawimawh khenkhat vak en hitiu:-

1. Pauchamna neih zing: Mihiem lemhetna maia thil hithei lo ahih ziekin, Pathien dawt a amah deihdana, A thisana a tat, a mitnaucha, a belamte etkawla puih ding ahi. Pathien deihdan leh ei lunggel, lemguot dan akibang puoh ngal a.

2. Thagau mangthai lainatna mittui: Kristiente, Sapchuoma lawiupa dinga teldawkte lak ah Thagau lainatna mittui atawm taluo. Vaihawm thei, mipi ngaih a pha, Pathien deihbang taka semdawk zolo, amin maia nasem, theihtawp suoh hi ngal, kithalak belam ching tawbanga mawhpuokna I sep ziek uh ahi dem, Thagau lam ah dangchakna kiel anasa mah mah hi.

3. Bible sim zing: Bible sim zing hih, khuothim a chenget a dinga vak ahi a, Bible simloa chiehte, a kisui ua, a puk pai sek ui. Belam gilkiel, damlote a dinga Belampu pha apawimawh hi.

Mosi chuh Pathien in a sam a, Aigupta gam apata Israelte va puidawk a, gampha lientak, bawngnawi leh khuoizu a luonna gama puilut dingin nang ka hun sawl hi, a tii. Mosi'n a dawng a, "Kei Pharoah kawmah chieh a, Aigupta gama pata Israelte va puidawk dingin kei kuo ka hi?" ti'n a dawng hi. Mahleh, Lalpa Pathien in mi tamtak laka pat Mosi chuh ana sem dingin a samdawk a, mawhpuokna a pie a, a sawldawk hi. Pathien tihdana a chieh a, a hihleh umpih zel ding, amamawh bangkim pie zel dingin a kitiem a, a gen guol ngei in a chieh a, Lalpa'n a sawlna a sem piting hi.

Mosi pauchamna- "Aw zie mipite hin thil gilo huoisie tak ana hih tau a, sana pathien chuh ana kisiem tau a. Mahleh, tuhin a gitloh uh na ngaidam thei dem? Atheihloh ding levang na lehkhabu a ka min na ziksa kha thaimang dingin ka hun ngen hi" (Exo. 32:31,32)

Nehemia- Jerusalem kulhbang sie ta nung siemphatnaa panla a, tungding kit dingin Pathien kawma a nget zawh nungin a kipandawk a, tihin khawpi sietdan a gen hi. "I khawpi'u kulhbang sie, kawtpite chim ta, muhsit in I um ua, midangte khutthak nulna ding mai I hi tau hi. Kisau inla, midangin ei simmawh taklohma dingun, kulhbang siemthak hitiu, a ti a. Upa

leh vaihawmte'n le a kipahpih ua, kithutuok tak in, kisai ting uh tungding thak kit hitiu, a tiu a."

Napha sepna leh Pathien thupiek sepdawkna dingin, melma tampi leh haksatna tampi um in a, Lalpa'n mawhpuokna mun chuom chuoma dinga ei sap leh sawlte I hiu ui. Na mawhpuokna hih nang deihtelna hilo in, Pathien in amah deihdan sem dinga mipite manga ahun sawl leh teldawk na hih kihengilh ki'n.

Vision: Vision, muhlawkna kichien tak nei mi, lawiupa apawimawh hi. Vision hih Pathien apat hung kipan ahi a, mihiem siemkawm ei puoi. Pathien in a mite kawma, a sepdawk ding uh, a zuih ding ua a piek, pawimawh leh kichien mah mah chuh ahi. Pathien ngaihkhawk, thiltup sepdawk ding aum tiengleh, zie semdawk thei ding chuh, mi ginum leh diktat, amah deihbanga sem piting thei dingte kawma a hetsak a, a piek sek ahi. Taksanna, ginna dettak neite chuh muhlawkna kichientak neite ahi sek ui. Taksanna, ginna dettak neilote'n zie muhlawkna hih chang thei puo'n au. Mosi hin muhtheihloh pa a muh ziekin, a muhlawkna chuh mang in, ginum tak in a pang a, mi lopi tak ahung suok hi. Elija suokpa'n le sepaih tamtak umkimvel a mu a, Elija'n vang van sepaih tamtak a mu'i.

Sapchuom puitu dingin Thagau lam mitvakna neih angai hi. Nang leh nang ana ki-enchien in, tisa mi na him, thagau mi??

Taksa (Natural)	Thagau (Spiritual)
1. Amah kimuong (Self confident)	Pathien muong (Confident in God)
2. Mi hihna hechien (knows men)	Pathien hihna hechien (also knows God)
3. Amah deihdana thupuk (makes own decisions)	Pathien deihdan hawl (seeks God's will)
4. Kithalawp (ambitious)	Kingainiem (humble)
5. Thilthak siem (creates methods)	Pathien deihsan zui (Follows God's example)
6. Thuneihna nuomsa (enjoy commands)	Pathien thu zuih nuomsa
7.	(delights in obedience to God)
8. Amah sepphat man hawl (seeks personal reward)	Pathien leh midangte lungsiet
9.	(loves God and others)
10. Amah a kinga (Independent)	Pathien a kinga (depends on God)

Lalpa'n sep ding tampi um henla, mi tampi um lele nang khel khel ahun matnuom leh nang le Lalpa aw ngaitha zing kawmin, a thupiek dungzui in, theihtawp suoh in, ana sem inla hileh chin, na ginum a, phachuomngai taka, na sepna zat zata ama'n hun umpih a, hun vangsak zel ding ahi.



Ngetna

Chamna aw hi subscribe a, Articles a hun pie zing ding in leh subscriber ding hun hawla sponsor hun bawl zel ding in, chun aphung vukna ale pang dingin na tawmgaihnau leh deihsaknau Pathien min in ka hun ngen ui.

- Editorial Board

SAPCHUOM PUTU TE DINMUN DING KHENKHAT

(Sapchuom Changkang Zawte Bawldan/Chiehdan)

By: Evan. L. Minthang, D. Phailien

1. CHAIRMAN/SECRETARY TE DINMUN:

- (1) Committee Resolution him him Ho-In a phuondawk tei ei ding ahi.
- (2) Resolution hikhello thu behlap kawm hah phuon loh aphi. Angaitha te dinga chimcak um a suok thei.
- (3) Kipahchak leh kigaih haw hi Sapchuom in angeihsek puoi - Mun thiengtho ahih ziek in.
- (4) Meeting thu leh thuneu haw ah Chairman/Secretary kihettuoh zing ding ahi. Sapchuom hiselna ahi.
- (5) Member khat le nih in thu mawk passed loh aphi. Committee hetpih loh in.
- (6) Committee Meeting tieng Chairman ahim Secretary ahim in Agenda luihdawka, highlight – neuchah suklat ding. Mahvang Member te ngaihdan (opinion) lak tam a ei kha kamtamlo deuh a um aphi. Meeting chiehdan ahi.

- (7) Member te ngaihdan laktam hi leadership na ahi.
- (8) Pathienni haw a sum dinmun report zel hi Sapchuom hiselna ahi.

2. **HO-IN CONDUCTOR TE DINMUN:**

- (1) Conductor hi mipi puitu ahih akihet zing ding ahi. Ziechuh, lawhtitna ahi.
- (2) Conductor kamtamlo, hun mangtawm a midang hun pick tam chuh lawhtinna ahi.
- (3) A conduct tha sung ah Ho-In sung leh Thugen ding bangkim a mawhpukna vek hina. Office leh Biel lam apat thu hung ahih ngalloh chun.
- (4) Kikhawp hun a mi khat, nih-vei/thum-vei sap loh ding. Member te hawp thiem ding.
- (5) Pathien pahchakna la hi atam lama sak sak guot ding. Pathien pahchak khela pawimawh umlo ahih zieck in.
- (6) Sapchuoma phuonding pawimawh hun hawn ahih tieng micheng or department chenga hawnsek hi leh, mimal khat/nih gen chuom lo in.
- (7) Ho-In hi munthieng leh zahum ahih zie sulang zing zing in.

3. SAPCHUOM PUITUTE LEH MEMBER TE HETBEH DINGA PHA:

- (1) Church Timing suk dik guot zel kha lawhtitna ahi.
- (2) Puitu hihna chu mipite masanga HO-In tunsek hi ahi.
- (3) Ho-In zawt ding tieng kisukthien, I van leh thuom ettup; sathau, limet haw hi matzel dinga siem ahi tih het ding.
- (4) Thugen lai a mobile phone tawl zat zat ahim, Bible sim guola kilat khun Thugentu leh ei muzing te a chawmpuoi.
- (5) Member I hihna dungzui a I chutna dingmun het aphai Usher ten zie khun va chuh, ei tih tieng u leh a kek den batzieng loh ding ahi.
- (6) Thugentu thugen hetchet guon, tukkhuk lam etsak khun, Thugentu a chawmpuoi, tih het aphai.
- (7) Puitu chun mi uhchuom, deihchuom, pahchak chuom a neih tieng Puitu ahihna a suniem sek. Sapchuom mipi aneu, alien kibang taka et ding ahi. Zie chu Krista I batnau ahih ziek in.
- (8) Puitu/leader kamtam te kawm ah Pathien in thutak, thuguk, avawpsak ngampuoi. Thip tam kha chitna bul ahi.
- (9) Lei control thei khat chauh aum – ziechu Lalpa thagau ahi.
- (10) Puitu mawhpuokna chu mi va tattoooh ding hilo in thubuoi, labuoi va sucham dinga guot ahizawi.
- (11) Puitu mawhpuokna: Mi liengvai, gimthei-meithaite va veh a thamuon zel hi ahi. Bible dungzui in.

- (12) Puitu chu; Noah guola a Insung mi cheng ‘Hukdamna Kuong’ a chuonsak zo hih angai.

Abraham banga a zi, a cha thagau gam Kanaan tutzo mi hih angai hi.



AHI KHEL PUOI

1. Athak cheng hi le apha ei khel puoi.
2. Atam cheng hi malam zuon ahi khel puoi.
3. Kithenna cheng hi apha ahi khel puoi.
4. Malam zuon cheng hi adik ahi khel puoi.
5. Apil cheng hi makai thei ahi vek puoi
6. Makai cheng hi mipil ahi vek puoi.
7. Hi kisa cheng hi ahi ahi-khel puoi.
8. Mipite deih hi Pathien deih ahi khel puoi.
9. Mah hi kisa cheng hi min hi asa khel puoi.
10. Mihiem te pahchak hi, Pathien pahchak ahi khel puoi.
11. Mihiem in ting asak te hi Pthien in ting asa khel puoi.
12. Bawl thei kisa te hi abawlthei ahi khel puoi.
13. Mahni phasak leh deih dan hi apha khel puoi.
14. I deih cheng hi I mamawh ei khel puoi.
15. I neih cheng hi ei a dinga pha ahi khel puoi.
16. Ei kigel dan hi mite ei gel dan ahi khel puoi.
17. I kawma thu pha hileh kilawm tak hung gen te haw hi ei deihsak ahi khel puoi.
18. I mai changa ei pakcha cheng hi lunggil a ei pakcha ahi khel puoi.
19. Pathien min kilamna cheng hi Pathien kipahna ei khel puoi.
20. Pathien in mite muha kilawm phawt leh tia, phasa zieng ei puoi.

CHAMNA AW PATRON MEMBER LIST

CHIEF PATRONS:

1. Pu S. Paukholal	Chief of Bunglon	1994
2. Ebenezer Chapel	D. Phailien	2014
3. ESC Shillong	Shillong	2014
4. Mr. S.K. Juiliana	Lamphel	2014
5. Nk Sawmte K. Gangte	Fujairah, UAE	2015
6. Nk Esther Tinglamkin	Gangte Veng	2015
7. Pu Thangzago (K.Vawmcha)	Chiengkawnpang	2015
8. Langol ESC	Langol	2016
9. Mrs Hoisi W/o Laldawng K. Gangte	Jiribam	2016
10. Upa Letkam	Bunglon	2016
11. Pu (L) Kamgo K. Gangte	Phuolsanbung	2016
12. Shillong Local Missionary Board	Shillong	2016
13. Pu Lunkholal Gangte	New Delhi	2017
14. Pu Noksieki	New Lambulane	2018
15. Nemkhola	New Lambulane	2018
16. ESC Gangte Veng M&B	Gangte Veng	2018
17. Nk. Nancy Nemneihvak	Hill Town	2019
18. B. Lalven	Lamphel	2019
19. Ginkhothang S. Gangte	Throilouk	2020

PATRON MEMBERS:

1. Pu Henkhojam	Siempat	1994
2. Sep. L. Gangte	5th Assam Regt.	2003
3. Dr. Lalazzadal	Chiengkawnpang	2004
4. Upa Niala	Shillong	2004
5. Pu P. Gangte	Shillong	2004
6. Pu B. Manga	Shillong	2004
7. Pu S.T. Gangte	Shillong	2004
8. Pu Lakithang	Delhi	2004
9. Rev. Dr. Soson	Dimapur	2007
10. Rev. T. Kampu	Guwahati	2008
11. Pi Phalneiththiem	Dehradun	2008
12. Pu B.K. Gangte	Dehradun	2008
13. (L) Hengo	Chief of Chongmun	2010
14. Upa Dr. L.S. Gangte	Chiengkawnpang	2011
15. Pi Niengzalam	Chiengkawnpang	2011
16. Pu Sangvung	Chiengkawnpang	2011
17. Pu S.K. Gangte	Shillong	2011
18. Pu Lovejoy	Kohima	2013
19. Pu Goginthalang	Shillong	2013
20. Pu L. Minlun Gangte	Shillong	2013
21. Pi Lalkim	Shillong	2013
22. Hav. H.L. Gangte	Shillong	2013
23. Ms. Grace Lalbiek	Guwahati	2013
24. Pu L. Neihsiel	Shillong	2013
25. Pu Lamtinlien	Shillong	2013
26. Pu S. Thienlaljoy,	SDO H.Q. Veng	2013
27. Pu L. Sawia	Gangte Veng	2013
28. (L) Lt. Col. L. Gangte	Chiengkawnpang	2013
29. (L) Upa K. Manga Gangte	Shillong	2013
30. Rev.Dr. Th. Lamboi Vaiphei	Hill Town	2015
31. Pu K. Pauboi Gangte	Chiengkawnpang	2015
32. Siemlaljoy	Lamphel	2016

DIAMOND MEMBER:


1. Upa Lamkhemdem	Chiengkawnpang	2015
2. Mrs Felli	Chiengkawnpang	2015
3. Moizokim (Chloe)	Lamphel	2015
4. Pu Lame B. Gangte	Langol	2016

GOLD MEMBER:

1. Pi Niengneihchoi	New Delhi	2014
2. Agape Children Eng. Jr.H/S.	Ithing, Thanga	2016
3. Upa Th. Mangnug	Bunglon	2016
4. Pi Chawimawi	Lamphel	2017
5. Pastor Gouliennang & Family	Tripara	2018
6. Muntha ESC	Muntha	2018

SILVER MEMBER:

1. Pi Sailothangi Thangzom	Old Lambulane, Imphal	2014
2. Antioch High School Abicharan	Tripara	2014
3. Upa Thanglal	Bijang	2015
4. Upa Laftinthang	Gangpimul	2015
5. Lamneihhat	D. Phailien	2018
6. Pu Sonpee S. Thangzom	Lamphel, Imphal	2018
7. Pu P.L. Manga	Lailak, Mizoram	2018



PIN

--	--	--	--	--	--

Chamra Aw

(Evangelical Monthly)

Regd. No. 64436/96

E-mail:e7s7c7@gmail.com

www.synodchurch.com

Alak man apat ₹

If undelivered pliz return to:

ESC SECRETARIAT,
Chiangkawnpang, Churachandpur,
Manipur - 795158

*Published by Rev. T. Kongon on behalf of the Evangelical Synod Church
Printed at THAWNSAUAU PRINTING WORKS, CENTRAL LAMKA.*